

閩

詩

錄

閩詩錄丙集卷十二

侯官鄭杰原輯

侯官陳衍補訂

林仲虎

補

仲虎字景瞻號定窗甯德人年十三能屬文
以武舉魁漕選嘉泰初廷試第一開禧間副
李壁使金

出疆

去時不敢留姓名一身萬里鴻毛輕征鞭不返長淮
水正恐來者愁此行吁歎此行良獨難出門兒女更

辛酸平生崛強身是膽自許虎口能生還從前鷗鷺
奮不飛機心一動成驚疑願言嘻嗑噉兒齒直到齒

落兒不知

甯德志

陳

映

補

映長樂人嘉泰初知汀州有政績

北樓

南澗吹雲過北團北山飛鳥入南山區區雲鳥緣何

事未似風流太守閒

長汀縣志

阮文卿

補

文卿一作文子長溪人嘉泰二年進士歷國

子學錄終肇慶府通判

壽趙仙尉

君不見茗溪有山號浮玉降神儲瑞皆天族又不見
茗溪有水名水晶地靈人傑盡維城茗溪山川稱第
一孕秀梅仙尤傑出我來席上揖清風義氣相與吞
長虹見人須見大丈夫縱是封侯亦不如周官一卷
長生籙未必人間有此書功名一入英雄手彩棒暫
持出浙右摧奸扶隱李開封李少府事夜月花村無吠狗
凜凜英風凌四豪趙少府事一同誰敢犯秋毫不惟握髮
勤延士又且官清馬骨高書生慣作無氈客負篋南

歸居最仄何憐蹤迹苦奔馳俾近淵明時請益馬走
暫停憇縣齋晨昏黃嬾仍相陪不覩王母蟠桃結隔
牆無得獻金杯欣逢子月陽來復一天佳氣回寒谷
萸生九葉慶垂弧僉將瑞應長庚宿綠衣槐簡舞蹠
蹠重拜萱堂王母仙瑤池新革偷桃令有子今如曼
倩賢不祝算如龜與鶴願君早施江夏略掃除羶穢
口神京長與蒼生同壽樂不祝祿如山與丘願君爵
冠朱虛侯今歸且定郊鄩鼎長使卜世過成周

截江網

陳俞補

俞字伯俞閩縣人嘉泰二年進士官太常博士

士

贈畫魚賈兄

春江浩蕩春江濶夜半湖聲湧新沫曉風吹斷碧雲
根萬頃滄波帶晴豁浪花激灩翻紅桃羣魚出沒乘
輕濤悠揚得意鼓鱗鬣十十五五同爲曹昔曾觀瀾
知此意真樂胷中渺無際常嗟物理難形容幸有賈
君得精藝巨魚奮迅凌江湖纖鱗錯雜依蘊蒲精神
萬狀幻新筆巧與造化論錙銖謁來過我示奇作數
幅生綃圖縱壑呼童展向虛堂中恍若當年見魚樂
如君畫思幾通神眼高世俗空無人石臺去後今幾

載毫端彷彿留芳塵又宜學取洞清拔寫龍不寫潛
波鮪徒能畫魚不畫龍空使饞夫吐饞水截江網

陳褭補

褭莆田人嘉泰二年進士

李侍郎修路

路餘百里兩山閒水驛山程總不安誰把千金平滑
磴免教一葉委驚灘行人感歎何時已賢守功名百
世看次第吾閩都似掌却嗤蜀道號泥盤輿地紀勝

張安修補

安修甯德人嘉泰二年漕舉發解

題靈龜洞

何年六丁驅霹靂蒼龍驚起穿崖石
拏雷掣電卷波濤來與真仙分窟宅
上崖窅深如側甕下崖谿衍如空洞
不知泉脈從何來百面鼙鼓長洶湧
大靈闔首浮中流背隱八卦開雙眸
似聞夏滌不能沒疑有神仙司諸幽
我曾雁蕩觀龍鼻半日纔通涓滴水
豈如六月散甘霖靈泉滾滾無窮已
惜哉埋沒荒煙中車馬來稀三疊重
若教遣向飛來峰龍井冷泉皆下風

湖南通志

丁伯桂

伯桂字元暉莆田人嘉泰三年進士累遷樞密院編修拜監察御史除中書舍人權吏部

侍郎

蘭陔詩話云元暉在言路二年諫疏盈篋皆力扶世道切中時弊詩不多作亦頗清迥

晚坐

小雨流花急香風隨晚荷清天聞野磬高木亂秋波
人度紅橋少燈來溪徑多幽冥間一坐深恐負蒼蘿

喻

峙補

峙字景山號大飛仙遊人與莆田陳宓相友

善

山中

我是山中萬戶侯
明知騎馬勝騎牛
晚來馬上看山色
不似騎牛得自由

興化府志

黃順之補

順之字佑甫邵武人開禧元年進士

聽悟師彈招隱

悟師手攜清風琴
爲我再奏招隱吟
九原靈均不可作
後人遺恨空沈沈
我今聽之淚霑襟
楚山日落秋聲起
古猿啼月空山裏
千年愁思上青楓
幽蘭無香桂花死
吾道非耶何至此
曲中厯厯分明道
苦怨王

孫負春草歲晚山中難久留憶君一夕令人老王孫
王孫知不知琴心招君胡不歸下沿湘江之水流上
逐湘山之雲飛一彈一招一太息水流雲飛朝復夕
送葉靖逸

山高積雪明歲序冉以逼佳人抱書去西湖失顏色
清夜獨慷慨詩壇夢生棘我有雙鯉魚對之不敢食
題九曲尼院

曾是霓裳第一人曲終認得本來身多年不作東風
夢閑卻薔薇一架春

觀冷水峪桃花

石家步障久成塵移作包山一段春惆悵日斜原上路年年紅雨打行人

以上前賢小集拾遺

陳垓補

垓字漫翁閩縣人襄六世從孫開禧元年進士官至淮東提刑

絕句

硯乾筆秃墨糊塗半夜敲門送省符擲得么么監獄廟恰如輸了選官圖

吹劍錄云陳漫翁監轉般倉與鎮江守喬平章爭一事平章乞回避漫翁得嶽祠吏持牒索回文漫翁就書一絕云云

羅知古補

知古晉江人開禧元年進士累知建安縣興
化軍通判以廉平稱

玉笥山鄧仙

騷人曾次幾江山更著危亭山水閒羣鷺齊飛殘照
落雙鳬自在白雲閑平蕪縈繞青羅帶遠岫參差綠
髻鬟此意何人共幽獨我來終日欲忘還

雙峰亭

亭下波光亭外山高低融洩照人寒最宜風月虛明
夜不著秋毫眼界寬

以上輿地紀勝

陳

韓補

韓字子華號抑齋侯官人開禧元年進士累
官刑部尙書江東制置大使知樞密院事

遊武夷作

闔風元不隔扁扉桑柘松筠匝匝圍溪貫一原藏曲
折山羅萬象欲騰飛仙壇起霧成丹竈玉女披霞作
綵衣寂寂幔亭天籟息笙簫疑向夜深歸

武夷築精舍

浮世何嘗有定居愜情便可著茅廬久知名利爲韁
鎖愛此溪山似畫圖種菊疎籬慕陶令栽梅淺水學

林逋只須此地延風月休問君王乞鑑湖

截江網

曾治鳳

補

治鳳字君輝晉江人開禧元年進士官至經

略安撫使端平二年進直徽猷閣知建甯府

妙庭觀

來訪雙成宅溪流遶故山玉真歸帝口金鼎落人間

雲氣生窗戶松聲記珮環神仙在何處且得片時閒

富陽

志

李仲光

補

仲光號肯堂建安人開禧元年進士累官汀

州雷州教授

贈弈碁藍氏子

古人制此文楸枰要下黑白知死生閑中借此消永
日未必能取人心爭後人不識古人意致使方寸生
縱橫爛柯人去弈秋死通國善奕誰知名東南地勝
人最傑下至百技今咸精手談坐決勝與負藍氏之
子馳其聲沈機終日靜不語一子落手四座驚肯堂
爲人百不解僻性從來要疎快推倒碁枰君莫怪不
同眼前論成敗

截江網

卓田補

田號稼孫建安人開禧元年進士

送山藥與友人

陽公得種自藍田種在深山不計年雅愛伏神爲伴
侶更邀枸杞作比聯俗名謾自呼山芋佳號由來號
玉延吸盡羊羹殊可厭藉渠風味滌腥羶

謝惠白鷺

紅船鴻鵠已驚飛何幸今朝得雪衣煙雨風標元自
貴雲霄氣格那須肥閑花數畝聊供步淨水三泓足
可依莫憶鳳凰池上路箇中步步是危機

游九言

九言字誠之建陽人定夫族孫開禧間官至
宣武參謀卒諡文靖有默齋遺稿

聽鄭三彈雙韻子歌

寒窗積雪生虛明玉壺風折層簷冰朱霞秀色妙公
子理絃燈下高亭亭遊絲兩兩掛孤月雙聲應手無
留停月寒坏戶砌蟲泣雲凍出浦邊鴻征蒼蠅撲紙
窗欲透螺贏穴桑兒未成琵琶寬詳雙韻切合悽盡
向弦中說酒酣疏綺雜娛嬉誰道壯夫心更折一從
羶毳被河山學得聲容雜辨別鴈鵠金屋沸歌吹鼠
頭寶陌行鞞鞞帕腰漫歌作彎弧捉耳酌觴真折馘

眼前猶聽舊歌辭鳳韶豈猶鏘虞時罷彈三喟寢不
熟風定寒江靜夜悲

林伯成補

伯成字知萬長樂人開禧中曾充金正旦副
使

嘉定丙子攜子元鼎元泰同張器之口叔郡貢
士唐口口卿子輝同遊浯溪賦此以識歲月

口時方喜能口口責備猶疑過頌功歸美從來臣子

事誰歌宋德乃心同

湖南
通志

柯夢得補

夢得字東海蒲陽人以特科入仕有抱甕集

陌上桑

朝采陌上桑暮采陌上桑一桑十日采不見薄情郎
正是吳頭桑葉綠行人莫唱江南曲

見舊題壁

小遲點筆醉還唄書斷蕭梁古佛塵今日重來應抵
掌十年分付未逢人

以上前賢
小集拾遺

夢蜨

一覺千年一轉機覺來還是夢還非當時夢裏知爲
蜨便好穿花傍水歸

後村千
家詩

鄭性之補

性之字信之初名自誠福州人嘉定元年進士第一理宗朝累官寶章閣待制知樞密院參知政事出知福州

落梅

夜來幾陣隔窗風便恐明朝已掃空點在青苔真可惜不如吹入酒杯中

後村千家詩

徐範補

範字彝甫侯官人嘉定元年進士累官國史編修官寶錄院檢討官宋史有傳

過太行山

茫茫遠樹隔煙霏
獵獵西風振客衣
山雨未晴嵐氣溼
溪流欲盡水聲微
回車廟古丹青老
碗子城荒草木稀
珍重狄公千載意
馬頭重見白雲飛

澤州府志

楊志補

志字存誠龍溪人嘉定元年進士知長溪縣
百廢具舉遷廣州通判

綺川亭

一川綠淨滄浪水
千朵紅稠菡萏花
病眼紛紛何所似
江天落日散餘霞

廣西通志

劉用行補

用行字聖與晉江人嘉定元年進士端平初
守安慶嘉熙二年起知潮州改知贛州

遊浯溪

祿兒豈解傾唐祚□□□□兩翁蜀道至今遺□
□□□□底照孤忠摧風溜□□□□地回天剋
復功人□□□□盡不知磨盡幾英雄湖南通志
金石略

鄒恕補

恕泰甯人嘉定元年進士

回龍嶺

蘭若半空中雲山第幾重瀑流千丈練鶴宿五株松
曉雨禪房黑霜林木葉紅懸崖回首望歸雨過前峰

福建
通志

許應龍補

應龍字恭甫福州人嘉定元年進士官至簽
書樞密院事贈資政殿學士銀青光祿大夫
宋史有傳

贈鄭樞密

邱壑方將窈窕尋肯貪斗印耀黃金幾願中宸留行
詔莫返元樞勇退心紅旆分藩雖足樂丹誠戀闕自

難禁浮雲出岫知無意祇恐蒼生望更深

東澗集

上官渙西補

渙西字元之邵武人嘉定元年進士官至大理卿集英殿修撰

小殊山

雙岫西南聳東山小更殊形分閭嶺秀名自隱翁呼
日映光濃淡雲深色有無須憑恕先手畫作遠山圖

福建通志

劉克莊

克莊字潛夫號後村莆田人以蔭仕淳祐中

賜同進士出身官至龍圖閣直學士卒諡文
定有後村集

劉後村小傳云嘉熙元年知袁州坐言濟王
事爲御史蔣峴所劾與方大琮王邁同罷歸
淳祐六年令赴行在奏事既至奉御劄劉克
莊文名久著史學尤精可特賜同進士出身
除祕書少監令與尤煇同任史事兼中書舍
人史嵩之服闋御筆除職予祠令克莊行詞
克莊奏嵩之有無父之罪七舊相致仕合有
誥詞今臣行嵩之之詞未知爲褒爲貶論奏
不已爲殿中侍御史章瑛劾罷尋依舊職知
漳州復除崇政殿說書起居舍人兼侍講力
奏不草史宇之答詔十二年除右文殿修撰
知建甯府改福建轉運副使以鄭發疏褫職
寢新命提舉明道宮克莊學問充積甚有文
名真德秀嘗以學貫古今文追騷雅薦之晚
年爲賈似道一出君子惜焉所著後村居士
前後續新四集行於世

案宋詩鈔小傳云初趙紫芝徐道暉諸人擺落近世詩律斂情約性因狹出奇合於唐人時謂四靈體格後村年甚少刻琢精麗與之並驅已而厭之謂諸人極力馳驟纔望見賈島姚合之藩而已欲息唐律專造古體趙南塘曰不然言意深淺存人習懷不繫體格若氣象廣大雖唐律不害爲黃鍾大呂否則手操雲和而驚颺駭電猶隱隱絃撥間也感其言而止論者謂江西苦於麗而冗莆陽得其法而能瘦能淡能不拘對又能變化而活動

齊人少翁招魂歌

夜月抱秋衾支枕玉鸞小
豔骨泣紅蕪茂陵三十老
臥聞秦王女兒吹鳳簫
淚入星河翻鵲橋素娥剗襪
跨玉兔回望桂宮一點霧
粉紅小蜨沒柳煙白茅老
仙方睡圓尋愁不見入香
髓露花點衣碧成水

東阿王紀夢行

月青露紫翠衾白相思一夜貫地脈帝遣纖阿控綵
鸞崑崙低小海如席曲房小幄雙杏坡玉鳬吐麝熏
錦窠軟香蕙雨裙衩濕紫雲三尺生紅鞢金蟾吞漏
不入咽柔情一點薔薇血海山重結千年期碧桃小
核生孫枝陳王此恨屏山知

趙昭儀春浴行

花奴一雙鬢垂耳綠繩夜汲露桃蕊青桂寒煙濕不
飛玉龍呵暖紅薇水翠鞢踏雲雲安帖燕釵微御香
絲髻小蓮夾擁真人紅梅犯雪欹一朵鸞錦屏風

畫水月鵝鵲抱頸切蘭葉劉郎散卻金餅歸笑引香
綃護癡螻

題忠勇廟

士各全軀命惟侯視死輕張巡鬚盡怒先軫面如生
短刃猶梟寇空拳尙背城新祠簫鼓盛人敬此神明
隨隱漫錄云紹定庚寅春汀寇入譙趙守竄
殿司裨將胡斌領弱卒二百巷戰矢盡刀折
易雙鐵鞭所殺尤眾死焉坐執雙鞭數日不
僵民賴其力多獲竄免守臣王埜聞于朝贈
武節大夫贈廟額忠勇

周漢國公主挽詞二首

孝謹親顏悅溫恭婦德修鵲橋方紀節鸞扇忽驚秋

魯筆王如卒湘弦帝子愁願言寬聖抱况返蕊宮遊
賜館恩通內如瑩詔卜鄰來應自仙佛去尙戀君親
望送龍綃溼封崇鶴表新不能秉彤管羞媿作詞臣
案庶齋老學叢談云理宗聖學高明尤工于文周漢國公主薨誌銘詔楊平齋撰挽詩以劉後村爲第一

漁梁

春泥滑滑雨絲絲一路陰寒少霽時水入陂渠喧似
瀑雲從山崦上如炊燎衣去傍田家火炙燭來看野
店詩落盡梅花心事惡獨搔蓬鬢繞殘枝

寒食清明

寂寂柴門村落裏從教插柳記年華禁煙不到粵人
國上冢亦攜龐老家漢寢唐陵無麥飯山蹊野逕有
梨花一尊徑藉青苔卧莫管城頭奏暮笳

贈陳起

陳侯生長紛華地卻似芸香自沐薰鍊句豈非林處
士鬻書疑是穆參軍雨簷兀坐忘春去雪屋清談至
夜分何日我閒君閑肆扁舟同泛北山雲

戊辰書事

詩人安得有春衫今歲和我百萬緜從此西湖休插
柳剩栽桑樹養吳蠶

鶯梭

擲柳遷喬大有情
交交時作弄機聲
洛陽三月春如錦
多少工夫織得成

落梅二首

錄一

一片能教一斷腸
可堪平砌更堆牆
飄如遷客來過嶺
墜似騷人去赴湘
亂點莓苔多莫數
偶粘衣袖久仍香
東風謬掌花權柄
卻忌孤高不主張

病後訪梅

夢得因桃卻左遷
長源爲柳忤當權
幸然不識桃并柳
也被梅花累十年

鄴侯詠柳云青青東門柳歲晏必樵悴楊國忠以爲譏已

瀛奎律髓云寶慶初史彌遠廢立之際錢唐書肆陳起宗之能詩凡江湖詩人皆與之善宗之刊江湖集以售劉潛夫南岳稿與焉宗之詩有云秋雨梧桐皇子府春風楊柳相公橋哀濟邸而謂彌遠本改劉屏山句也或嫁爲敖臞菴器之所作言者併潛夫梅詩論列劈江湖集板二人皆坐罪初彌遠議下大理逮治鄭丞相清之在鎖闥白彌遠中輟而宗之坐流配于是詔禁士大夫作詩如孫花翁季蕃之徒改業爲長短句紹定癸巳彌遠死詩禁始開潛夫爲病後訪梅絕句云云此可備梅花大公案也

答友生補

讀易參禪事事奇
高情已恨挂冠遲
清于楚客滋蘭日
貧似唐人乞米時
家爲買琴添舊債
厨因養鶴減晨炊
君看江表英雄傳
何似孤山一卷詩

呈袁秘監

補

近日頗聞有峻除人傳君相重師儒細旃坐穩方輪
講羣玉峰高未要扶別後曾過東閣否新來亦乞鑑
湖無幾時供帳都門外真寫先生作畫圖

歸至武陽渡作

補

夾岸盲風掃棟花高城已近被雲遮遮時留取城西
塔籬底歸人要認家

再贈錢道人

補

拙貌慚君仔細看鏡中我自覺神寒直從杜甫編排
起幾箇吟人作大官

葺居

補

兵火間關髻欲絲歸來聊卜草堂基
架留手澤書堪看爨有躬耕米可炊
畏濕先開通水竇貪明稍斫近簷枝
旋移梅樹臨窗下準備花時要索詩

方寺丞新第二首

補

宅成天下借圖看始笑書生眼力慳
地占百弓多是水樓無一面不當山
荷深似入苕溪路石怪疑行雁蕩間
只恐中原方鼎沸天心未遣主人閒

一生不畜買田錢華屋何心亦偶然
客至多逢僧在坐釣歸惟許鶴隨船
按行花木皆僚友主掌湖山卽

事權京洛貴人金谷裏安知世上有林泉

方寺丞旋子初成

補

船成莫厭野人過久欲從公具釣蓑積雨晴來湖面
潤殘花落盡樹陰多新營小店皆依柳舊有危亭尙
隔荷所恨前峰含暝色不然和月宿煙波

贈翁定

補

相逢乍似生朋友坐久方驚隔澗餘徧問諸郎皆冠
帶自言別業可樵漁住鄰秦系曾居里老讀文公所
著書十七年間如電瞥君鬚我鬢兩蕭疎

題方武成詩草

補

性僻愛詩如至寶借君詩卷百迴看吟來體犯諸家
少改定人移一字難東瀑爲題猶天矯吞山入句尙
蒼寒嗟余老鈍資磨琢安得同衾語夜闌

感昔二首

補

談攻說守漫多端誰把先朝事細看棄夏西郵忘險
要失燕北面受風寒旁無公議扶种李中有流言沮
范韓寄語深衣揮塵者身經目擊始知難

先皇立國用文儒奇士多爲筆墨拘澶水歸來邊奏
少熙河捷外戰功無生前上亦知強至死後人方誅
尹洙螻蟻小臣孤憤意夜窗和淚看輿圖

燕補

野老柴門日日開
且無欄檻礙飛迴
勸君莫入珠簾去
羯鼓如雷打出來

過永福精舍有懷仲白補

一樹梅花撿舊居
主人仙去客來疎
白頭留得吟詩友
每見郎君勸讀書

贈防江卒補

一炬曹瞞僅脫身
謝郎棋畔走苻秦
年年拈起防江字
地下諸賢會笑人

題繫年錄補

炎紹諸賢慮未精今追遺恨尙難平區區王謝營南
渡草草江徐議北征往日中丞甘結好暮年都督始
知兵可憐白髮宗留守力請鑾輿幸舊京

七月九日

補

樵子俄從間路迴因言溪谷響如雷分明雨怕城中
去只隔前峰不過來

謁南嶽

補

中原昔分裂五嶽僅存一嗟予生東南有眼乃未覩
清晨犯寒慄馬上親歷歷怪雲何處來對面失齒翠
午投勝業寺僧訝余不憚茗餘因獻嘲君定非韓匹

彼來旣軒露君至若封鐫余謂僧無躁茲可以理詰
止僧坐悅亭靈翳忽冰釋石廩先呈身岫嶠俄見脊
須臾天柱開最後祝融出高峰七十二固已得彷彿
鄴侯何嘗死懶殘元非寂恍疑在山中明當往尋覓
咄哉三尺雪孤此一雙屐駕言歎靈瑱樓堞晃丹赤
柏深不見人畫妙如新筆珠櫳千娉婷彈棋撫瑤瑟
茫茫鬼神事荒幻難究悉吾師太史公江淮徧浪迹
茲焉又浮湘汗漫恣游陟雖然乏毫端亦頗增目力
規模五字體蟠屈萬丈碧詩成投褚中何必題廟壁

郊行

補

薄有西風意郊行得自娛山晴全體出樹老半身枯
林轉亭方見江侵路欲無何妨橋纜斷小艇故堪呼

榕溪閣

山谷南遷維舟榕下

補

榕聲竹影一溪風遷客曾來繫短篷我與竹君俱晚
出兩榕猶及識涪翁

湘中口占

補

船頭吹火盧仝婢馬後肩書額士奴安得世間名畫
手寫予出嶺泛湘圖

見方雲臺題壁

補

寄書迢遞夢參差每見留題慰所思不論驛亭僧寺

裏有山水處有君詩

贈高九萬并寄孫季蕃

補

菊磻說花翁飄蓬向浙中無書上皇帝有句惱天公
世事年年異詩人箇箇窮築臺并下榻今豈乏英雄

豐湖

補

岷峨一老古來少杭穎二湖天下無帝恐先生晚牢
落南遷猶得管豐湖

小米侍郎生較晚龍眠居士遠難呼不知若箇丹青
手能寫微瀾玉塔圖

三月二十五日飲方校書園

補

纔入中年會面難安知白首此團樂不妨時駕柴車
出只作初騎竹馬看

伯兄迺漢司徒掾季子亦唐行秘書只願荆花常爛
熳莫令瓜蔓稍稀疏

空留蘚石仆斜陽不見奇章與贊皇何必雍門彈一
曲蟬聲極意說淒涼

百年如電復如風昨日孩提今日翁乍可生前稱醉
漢也勝死後謚愚公

早退分明勝一籌年行六十復何求東門瓜與南山
豆誰道君恩薄故侯

後有良工識苦心今無善聽孰知音老來字字趨平易免被兒童議刻深

劉克遜

補

克遜字無競號西墅後村之弟仕爲古田令

送楊帥

累詔登華省當時已避蹤身閑名轉重道大世難容南國因鋤薤東山得倚筇何當投劾去短褐許相從

詩林
萬選

鄭可學

可學字子上莆田人嘉定四年特奏名官衡

陽戶曹有特齋詩集

蘭陵詩話云公爲朱文公高弟文公守臨漳延教子弟嘗稱之日子上從大學語孟中庸講究晚年刪定大學一編示諸生曰此書欲付得人惟子上足以當之凡四方學者疑問必使公正之所著有春秋博議十卷三朝北盟舉要一卷師說十卷遺集散失僅傳此作意味頗似朱晦翁

和晦菴齋居聞磬韻

纖月照幽林秋氣一何爽散步豁煩襟曠然息羣想忽聞玉聲裏泠泠送清響頓令塵慮空頗覺道心長

王大烈補

大烈晉江人嘉定四年進士

賀人生女

祥光子夜都明徹
婷婷仙子來仙闕
精神玉雪比不
如猶帶蓬萊秋夜月
郎罷今晨莫世情
文粹閩人呼子爲郎父爲罷
那知便不顯門庭
我來只誦香山句
不重生男重生女

黃子信補

子信長秦人
嘉定四年特奏名
第二人調新
會鹽場有散翁集

投楊帥

六年兩度拜宸旒
換得青衫白上頭
飛鵲祇因無樹

繞窮後何暇擇林投明知著腳當來誤幾欲抽身不
自由安得有錢了官債便無三徑也歸休

歸時作

笑倩西風拂舊埃歸時行李似初來也知三載清貧
好博得一家強健回

漳州府志云子信初調新會鹽場帥楊長蘊
以其老榜爲監當心易之常招撫其簿書子
信將拂衣而去因投以詩云云

張

礪補

礪字渭老一字敬夫號松山羅源人嘉定四
年進士由檢點贍軍激賞酒庫所主管文字

遷吏部架閣官至參知政事封長樂郡公致仕卒贈少師

聞兄衛竄作詩寄之

飛旆翩然拂曙涼都門餞送集冠裳竄鄉此去嗟予
季忠國由來留異芳賈誼未云時不遇酈生白謂我
非狂橫江一網空朝市何物充庖薦廟廊

羅源縣志

李華補

華字實甫崇安人嘉定四年進士官至廣東
轉運使進直徽猷閣知潭州兼湖南安撫使
戊寅入嶺丁亥上元遊碧落洞

乳床奇詭鑑清漣碧落真人古洞天十載南遊纔一

到不妨重補到難篇

廣東通志

李韶補

韶字元善號竹湖福清人彌遜曾孫五歲能賦梅花詩嘉定四年進士歷太學博士上封事諫濟王獄忤史彌遠丐外通判泉州官至翰林學士知制誥諡忠清與杜範齊名目曰

李杜

遊虎邱

望中平坦獨崔嵬根跨滄溟浪打回不是巨靈潛擘

與祇應蓬島暗飛來經壇煙染千株石丹井雲封萬
古苔翠色高通蘇郡內滿城清雅絕塵埃

虎邱志

徐清叟

補

清叟字直翁浦城人嘉定七年進士官至兵
部尙書端明殿學士知樞密院事兼參知政
事提舉佑神觀出知泉州卒謚忠簡

淨明院梅巖恭和高廟御製

偶因祀事訪丹霞寺古山深石徑斜衝凍細尋梅信

息枝頭喜見狀元花

咸淳臨安志

贈建甯妓唐玉

上國新行巧樣花一枝聊插鬢雲斜嬌羞未肯從郎
意故把芳容半面遮

豹隱
紀談

王伯大

補

伯大字幼學號留耕福州人嘉定七年進士
理宗朝累官端明殿學士拜參知政事

贈戴石屏

詩老相過鬢已星吟魂未減昔年清揮毫不著塵埃

語盡把梅花巧琢成

梅礪
詩話

丹青閣

傑閣岩龕倚碧蒼菊花時節此持觴市聲一段隔秋

水橋影半空橫夕陽挺挺霜筠排竚立涓涓石溜引
山長人言絕頂多奇觀安得閑身宿上方

詩家
鼎鑪

李方子

方子字公晦光澤人嘉定七年進士官國子

學錄通判辰州

理學傳云先生初見朱子嘗謂之曰公爲人
自是寡過但寬大中要有規矩和緩中要有
果決遂名果齋嘉定初廷對第三調泉州觀
察推官適真德秀爲守以師友禮之暇則辯
論經訓每至夜分丞相史彌遠聞之不悅曰
此真德秀黨也使臺臣劾罷之歸四方學者
畢集訓誘不倦著有禹貢解寶慶二年樞密
真德秀尙書袁甫取進諸朝授朝奉郎元虞
集稱其于朱子之學確守而不變所謂毫分
縷析致知力行蓋終身焉者君子以爲確論

樵川郊行

避人忘井邑
耽靜步郊原
落葉風能掃
寒花霜更繁
山空樵響答
灘淺榜聲喧
願結山陽伴
長年此灌園

案見邵武府志

徐榮叟補

榮叟字茂翁
浦城人
嘉定七年進士
嘉熙中以集英殿修撰知靜江府
兼經略安撫司累官資政殿大學士卒諡文靜

贈常庵江羽士

曾跨金牛入帝鄉
歸裝金薤富琳琅
喚回客枕邯鄲

夢澗草巖花亦自香

武夷山志

劉崇卿

補

崇卿晉江人嘉定七年進士官通判

勸農和江萬里韻

年來兵餉瘠吾農天遣仁侯作歲豐
燕寢晝清塵不到螺江春滿澤無窮
詩陶幽雅熙熙俗文續周書噩噩風
別乘自憐無鋪地勸耕卻得到山中

截江網

李

遇

補

遇字用之號洞齋侯官人嘉定七年進士真
德秀弟子官監察御史秘書少監知潮州終

于廣東運判

題濮村

乞與東風十日晴
放教杖屨步雲輕
客閑到處俱詩
往春色濃時載酒
行別去江山如識
面重來花鳥更
關情一官休厭無
氈冷官冷元來愈
覺清

詠西湖江湖偉觀樓

舉目看來皆畫屏
只因欄檻接蒼冥
江湖二水一船
白吳越兩山相對
青雲北雲南何處
沒潮生潮落幾
時停西偏不被斜
陽礙直見家山與
洞庭

截江細

林夔孫補

夔孫字子式古田人嘉定七年特奏進士從
朱子學爲堂長官某縣尉著有書本義蒙谷
集

資聖寺

華峰跨蒼穹下有雲一壑翬飛二百秋蜂巢幾千落
靈泉際空留宿霧臨除薄山呈萬古姿竹隕六月鐸
當年有賢令神交契冥漠懷哉精魄歸永矣香火託
至今書壁間讀者爲嗟愕好事繼前志列巖成此閣
仰看斗插椽俯聽泉入鐸晤言千載心英氣凜欲作
西崖望蒙頂躋攀計已昨忽聞良友同共寫襟期樂

遐登破嶸岬幽討待綽約磅礴富蒸鬱陰衣茫紛錯
再拜五華君許莅他日約霜威爭餘氛晴宇洞寥廓

福州府志

陳

範補

範字朝弼崇安人文公弟子本籍建陽舉嘉
定七年進士授婺源尉秩滿遷丞崇仁偶有
疾自歎云倘來軒冕心無必見在詩書足自
娛遂歸隱不復出

卧龍潭

半巖欲墮潭渚深晝陽不到午陰陰洞簫一曲瑤笙

斷千山萬山雲水沈

武夷山志

閩詩錄丙集卷十二終

閩詩錄丙集卷十三

侯官鄭杰原輯

侯官陳衍補訂

黃幹

幹字直卿一字季直號勉齋閩縣人御史瑀
子嘉定間補將仕郎歷知漢陽軍安慶府主
管武夷沖祐觀亳州明道宮有勉齋集

閩中錄云勉齋受業朱門之門朱子見其足
以傳道以女妻之所著經禮諸書常同參定
築竹林精舍成謂他時可代卽講席者其直
卿乎晚年致仕家居受學益衆卒諡文肅

答曾伯玉借長編二首

白露下百草迅商薄修林幽人起長懷感此節物深
攬衣自徘徊撫劍還悲吟丈夫各有志莫作兒曹心
涉遠當疾趨畏景須就陰願言理輕車去上南山岑
祥麟踣魯郊孔袂何漣漣傷哉經濟心付與文字傳
馬公述孔志托意爲編年是非一以判纖悉不復捐
聞君臥邱壑蘭手磨丹鉛願言得其解努力希聖賢
侍晦翁飲浮翠用劉叔通韻

涼風振幽壑陰雲翳前山高懷厲清秋適意林莽間
煙橫萬家井水淨雙溪灣徙倚暮忘歸人境相與閒
遊子獨何爲千里方言還陪此杖履遊忘彼道路艱

心期更他年依巖結柴關

拜文公先生墓下

暝投大林谷晨登翠如亭高墳鬱嵯峨百拜雙淚零
白楊自蕭蕭宿草何青青悲風振林薄猿鳥爲悲鳴
音容久寂寞欲語誰爲聽空使千載後儒生抱遺經

早觀龍湫

夜宿羣峰裏朝遊大石湫寒潭飛薄霧疊嶂瀉洪流
側徑蒼苔滑叢祠古木幽神龍好高卧雲雨不勝愁

挽雲門鄭君

結友雲門日曾聞谷口翁松肥三逕雨鱸熟一絲風

行業鄉閭敬詩書子姓同論心獨餘恨秋草對碑豐

和魏元明四月菊

鵲鳩纔鳴歇衆芳忽看佳菊變秋光江頭雨漲梅同
熟隴上風清麥正黃莫待重陽拚一醉不愁長夏自
微涼籬根休遣兒曹見又說梨花捧壽觴

和江西王倉中秋賞月韵

明晦從渠造物慳好天佳月靜時看一輪天外長明
徹萬象胷中自屈盤星逐使來隨處見霜侵臺迥逼
人寒休觀玉兔頻頻擣活國須公九轉丹

劉正之宜樓四首

劉正之創新居以宜名其燕處之樓謂其春夏秋冬無不宜也同志之士旣已共賦之矣予因採詩之四宜以廣其意焉一章言宜其室家也二章言宜爾兄弟也三章言宜爾子孫也四章言罄無不宜也讀之者亦足以見予與正之道義相與之意云

春風滿庭除琴瑟亦靜好甕中有歡伯相祝以偕老
屏山重回首日暮起長思鴻雁來翩翩共賦棠棣詩
君家兩甯馨翠竹栖鸞鳳筦簫燕新居孔釋復抱送
山以靜故高水以靜故深福祿豈外求萬感皆人心

喜雨用前韻

雲霓天外起層層
畢月相隨徹夜橫
費得天公能幾力
數州愁苦變歌聲

睡覺歌聲古道旁
有人中夜攬衣裳
床頭斗酒聊自酌
不爲書窗一夜涼

陳有聲

補

有聲字廣宗長樂人
嘉定間以進士尉上高
廉靜不擾教士子以作賦之法

重修聖濟院

蒙泉距宜春相去百餘里有僧來問余借問何姓氏

乃余昔所敬見之蹙然喜敘余語未旣省記到山始
屋廬今何如舊者存有幾一別十八年再見復在此
僧云今勝前百蠹費更理昔茅塞蹊徑今道平如砥
昔門不容蓋今可駟結軌昔堂地一坳今去天尺咫
翬飛兩廡列翼從萬瓦起古殿布丹雘雲龕照青紫
臨流地寬曠一帶碧清泚竹院密回環松關秀兩峙
峰巒對青眼泉石洗幽耳最上兩龍湫層崖狀奇詭
水旱凡禱祈響答應甚邇載念此招提明禪祖基址
傳燈焰不續老子心所恥莊嚴七寶界因果非偶爾
問余求篇題以爲歲月紀余老書最拙況在塵筆裏

欲到身未能欲輟請未已忽然若天會拈筆書滿紙
大空一浮漚無成亦無毀廣濶包八荒歛藏歸一指
道足滿須彌意合在稊米幻成如是觀佛亦不在是
虛空白且光澄波靜無滓四山時出雲一月照徹底
天開道門庭不斷佛種子心地日杲杲光照千萬祀
陳 宓

宓字師復俊卿子莆田人嘉定中以父廕授
南安監稅知安溪縣後知漳州以直秘閣奉
祠卒諡文貞有復齋集

蘭陔詩話云公少遊朱文公門長從黃勉齋
遊信道甚篤嘗自言居官必如顏真卿居家

必如陶潛又深愛諸葛亮身死家無餘財庫
無餘帛庶乎能蹈其言云詩多見道之言亦
清徹無腐氣

往行都至嚴州烏駐館阻水留二日

村館通宵冷江鄉五月秋野梅酸味足隴麥餌香浮
水滿迷行逕瀾揚遏去舟亭衢如可待莫厭小淹留

城山松隱巖

穀城巖穴似飛來十里水光鏡面開夜雨松窗僧榻
靜秋風柳岸釣船回尋幽便扣興雲洞乘興還登呼
月臺每到西湖吟詠處令人偏憶故山梅

陳壩補

壩俊卿之後知南安縣

謝趙憲副使惠建茶

貢餘自合到侯王誰遣甘芳入莧腸野客驚看龍鳳
銙家人學試蟹魚湯題來諫議三封印分到尙書八
餅網盡灑從前腥腐氣時時澆取簡編香

莆陽文獻

莊夢說

補

夢說泉州人嘉定間仙遊縣尉

次許宰普惠院祈雨韵

垂鯨呼客響修廊杖履來遊蔭
葡萄堂窄堵擎天光繚繞遠山排闥翠
昂藏高僧宴坐鬚髯古縣尹新題詩

句香喚雨雨來端有驗會看行旅不齋糧

興化府志

許伯翊補

伯翊同安人嘉定九年以承事郎知仙遊縣
終福州府通判

訪景山

奉陪南極老來慕北山名鑿石濃書墨流觴款敘情
問誰挹仙袂笑我縛塵纓知是龍門客終難卧孔明

仙遊縣志

王邁

邁字實之號臞軒仙遊人嘉定十年登進士

第通判漳州坐交真德秀魏了翁削秩復知
邵武軍以秘閣提點廣東刑獄贈司農少卿

對青亭

終日在山中不知山可愛欲愛山中趣須在山之外
南山不古今悠然與意會西山無朝暮佳致固長在
蔡君金玉人結亭避闐闐面面蒼壁屏坐卧與青對
晚曦射紫翠宿雨濯藍黛能消幾兩屐不賞此奇概
芙蓉爲君裳蘭茝爲君珮今非避世時乃學陶謝輩
諸公富唱酬拔戟各成隊我出一轉語成功身始退
君爲端明胄忠孝終必大山靈縱有盟一出合破戒

蒼生正有求富貴不渠貸山債會一償相期在晚歲

飛翼樓

舊傳說范蠡故址

補

亭前一望海東流更有雄樓在上頭燕子飛來春漠漠鴟夷仙去水悠悠神交故國三千里目斷中原四

百州日暮片雲棲古樹昔人留與後人愁

詩家鼎鑪

除夕

補

憶昔都門值歲除高樓張燭戲呼盧久依淨社參尊宿難向新豐認酒徒天子未知工草賦鄰人或倩寫桃符寒宵別有窮生活點勘離騷擁地爐

後村千家詩

句

補

未知死所先期死自笑狂生老更狂

齊東野語云王實之邁有文名落魄不羈爲正字日因輪對及故相擅權理宗宜諭日姑置衛王之事邁卽抗聲日陛下則日衛王再則日衛王何容保之至耶上怒不答徑轉御屏日此狂生也邁歸鄉里自稱敕賜狂生嘗有詩云云

方左鉞

左鉞字武城莆田人嘉定中以廕授司法參

軍有煮瀑庵詩集

蘭陵詩話云武城早卒劉後村挽之以詩云
艸角詩名出流傳海內誇又有題方武城詩
草後云吟來體犯諸家少改定人移一字難
其見推名流如此詩稿惜已不傳

病中二首

錄一

日費行將典到琴窮愁那復病相侵倩人合藥無真
料就枕吟詩苦見心僕獻奇方單用草醫言速效莫
如參池亭咫尺無由到空聽蟬聲想綠深

海口

家園幾本芙蓉樹藥漸紅時又出來卻向秋風山路
上別人池館看花開

方元吉

元吉字文甫莆田人嘉定中奏補浦城令有
竹齋集

蘭陔詩話云文甫好苦吟劉後村題其詩卷
有物貴常因少詩傳不在多之句

無題

一穗香煙到日斜
靜聽蜂報二時衙
老僧不解傷春意
多採梨花作供花

趙庚夫

庚夫字仲白莆田人
嘉定中舉進士不第以
宗子取官宗正寺簿

案劉後村跋云仲白千古體寓其高遠于大
篇發其精博于短章窮其要妙
蘭陔詩話云仲白平生志業無所洩一寓于
詩歿後子幼家貧甚劉後村哭之以詩云家
留遺稿在棺問故人求又云託孤朋友事非
謂九泉知爲刪定其稿名山中集屬趙以夫
序而傳之

鶴食

鶴食從妻給花窠課子鋤絕糧緣買硯止酒爲耽書
野服迎人嬾禪心涉世疎丹爐添火候健似十年初
同僧遊潁陽塘上生院

沿堤上下看沙鷗得句支筇自點頭風露高時將鶴
伴溪山好處載僧遊老無志願惟漁艇閒有工夫上
寺樓歲晚淵明須自笑督郵未至合歸休

讀曾茶山詩集

補

茶山八十二癯仙千首新詩手自編吟到瘴煙因避
寇貴登從橐只棲禪新于月出初三夜淡比湯煎第

一泉咄咄逼人門弟子劔南已見祖燈傳

梅磻詩話云紹興末曾茶山卜居于越得禹迹寺東偏空舍十許間居之手種竹盈庭日讀書賦詩其中公平生清約不營尺寸之產所至寓僧舍蕭然不蔽風雨公詩有日手自栽培千箇竹身常枕藉一牀書蓋寓居時所賦也公年雖高吟詠猶不輟甫田趙仲白讀公詩集有詩云蓋山陰陸務觀實從公學詩陸有劔南集行于世故末句及之

趙以夫

補

以夫字用甫號虛齋長樂人嘉定進士理宗朝歷資政殿學士吏部尙書同修國史

詠蘭

一朶俄生几案光尙如逸士氣昂藏秋風試與平章

看何似當時林下香

全芳
備祖

李

訖補

訖字誠之號脰菴晉江人雲龍居士邴之孫
嘉定中以朝議大夫敷文閣待制守達州後
爲戶部侍郎

謁丞相祠觀八陣圖

人言忠孝不磨滅神物護持存水滸千家陵谷幾變
遷此石不移自章武本由黃帝古兵法六十四以八
爲伍髯孫且懼仲達走賊操遊魂何敢拒刻銘沙沒
水底碑教戰石存山下鼓一片丹心天地間萬世聞

風猶禦侮我來起敬凜如生再拜一言公必取瀼流
東截陣圖前寢隳城壁頽民宇能安拳石止波流願
回瀼患思民撫常使夔人知感公踏磧年年弔千古
四川總志

留元剛補

元剛字茂潛永春人嘉定間直學士院有雲
麓集

武夷九曲棹歌

存二首

七曲催船快上灘好山留與漫郎看經行雪瀑仙屏
下恍記齋堂夜帳寒

九曲遙岑更鬱然板橋漁市引長川喚回白馬賓雲

夢來看桑麻萬里天

鐵網珊瑚

王益祥

補

益祥長樂人甯宗朝官監察御史

題資福院平綠軒

丈室無餘地生涯小有天推窗成曠濶俯檻遠清漣
載酒日邊客聞歌柳外船隔牆人易與賸著買山錢
至元嘉禾志

林觀過

補

觀過號退齋閩縣人嘉定十年進士端平閒

知新昌累官分差糧料院

遊寶相院

古人期年變拙政媿格頑觸此三伏暑招提解征鞍
好風隨過雨稻花秀可餐南窗一榻涼久輸老僧閒
盤飧息萬慮竹梧凜相看清陰交蔽芾直節不可干
斯來結三友欲去復盤桓

瑞州府志

趙時煥

補

時煥字元晦晉江人魏王九世孫嘉定十二年進士官廣東運判

九日山送客

頻來因送客攜酒訪仙靈歸去成何事重來媿此亭
天寬野水白松潤石崖青倚杖思今古寒鷗落遠汀
南安縣志

上官彥宗補

彥宗邵武人嘉定十二年特奏名淳祐十年

官宜黃丞

騶獅嶺俗名愁思

遠望輕雲絕頂浮泉聲山色破牢愁當年聞有幽棲

客座對春風萬壑流邵武府志

王子申補

子申三山人嘉定庚辰永州郡丞

遊澹山巖

坤靈擘罅天幻奇一到仙凡覺兩歧處士清風存萬
古詩翁雅句見當時洞深不礙煙雲逸丹就那知日
月遲更上層臺瞻佛象媿無法語勘狐疑

湖南通志

陳珪

補

蛻龍洞

潛虬成穴古危岑曾爲編氓需旱霖石怪自留千載
迹泥蟠難駐九天心老松猶學擎雲勢羣籟渾驚動
地吟瀟灑禪關連勝概退遊誰不快煩襟

新城志

垂虹亭

高壓玉龍腰參差雁勢朝雄吞五湖濶平揖兩山嶢
闌檻中流出炎蒸白晝消暫來塵慮息那復日逍遙

吳郡文粹續集

句

石洞雲歸春雨足海門月上夜潮生

靈峰院三山志

案宋詩紀事補遺有兩陳珪一云長樂人嘉
定十年特奏名十四年修職郎建康府學教
授十七年撰題名記有蛻龍洞詩一首一云
連江人修職郎嘉定十四年建康府學教授
有垂虹亭詩一首靈峯院句一聯又云景定
建康志作三山人但三山長樂連江同屬福
州府易於傳訛而兩人同為修職郎建康府
學教授又同在嘉定十四年必係一人誤分

今併錄兩詩一聯而附辨之於此

鄭

江補

江莆田人嘉定十六年進士

句

石揭君謨椽筆健詩留子直翠珉珉

鼓山志

戴

翼補

翼閩縣人嘉定十六年進士初攝南康軍後

知邕州

贈星術黃太史

俗人談命不問晝夜皆以日在某者爲命而月之

所在爲身者謾不及究獨儒術黃生得之試以休咎無少差者奇哉茲術因賦詩贈之

粵從太極生兩儀大明生東月生西煌煌兩日照今古一晝一夜分主之人具陰陽中造化亦係日月之所舍在日爲命月爲身所主各隨其晝夜此數定不差毫毛惜哉庸術其傳訛談命以日不及月日本豈晝如夜何甘石不作今已矣星學之精其能幾掌中日月分旦昏獨有黃生精算爾黃生算到毫杪處吉凶定如鼓應桴奇哉此術真神祕世人不知反爲異俗流何可輕與談吾有穎濱月軒記

截江網

王 胄補

胄字希載號是菴晉江人嘉定十六年進士

官惠州通判

宋詩紀事補遺云入爲太學正遷博士校藝禮闈有諫官同典舉欲私所厚以冠多士其文險怪胄識之曰必某人也同典舉者色沮易其次第而心銜之

羅浮

傳聞此山分蓬島錦繡青霞疊相向飛雲通天兩絕
奇更出上界三峯上凌乘汗漫不可得倩誰圖畫丹
青狀朝真學道走俗子紀實留題出宗匠何當步虛
躡太微森列金庭五雲仗祗園琳宇山崔嵬鬱葱佳

氣天容開回頭卻立睨人境渺渺瘴霧驅氛埃非惟
此地相引領歎我爲爾胡爲來他年欲訪經行處請
看姓字鑱巖隈

羅浮山志

王九萬

補

九萬建安人嘉定十六年進士

壽侍郎七十九

炎涼薄流光榮悴猶生理芳莖化爲茅嘉橘變成枳
誰知古大椿霜雪自凝凝立身旣千仞驚陰殆百里
宜哉富春秋萬物聽獨止先生一靈椿聳壑屹山峙
納湖漑其根後溪擁其址平生學問力頓在名節裏

甘泉詎弗貴東山不爲起以身蹈高潔爲世律貪鄙
坐令夸奪輩疾走掩兩耳乃知公進退均爲國憑恃
恭爲陛下聖雅欲致圓綺黃金已九環丹詔行一紙
公心豈輕重上意實注委嘉平報初度吉音隨燕喜
耆英七十九彷彿富公是行歸礪溪載更詠淇奧美
方覺歲寒姿不隨世變靡錦溪入霞觴城山揖燕几

祝公如大椿明堂棟干祀

截江網

林干之

補

干之興化人嘉定中潮州通判

贈水簾洞黃秀才

讀書避世喧結廬五雲表澹泊足生涯詎曲藏深杳
仰觀紅日近俯視眾山小滄溟舞澎湃雲氣度浩渺
喬松蔓翠蘿絕壁挂啼鳥一派從天來長練挂木杪
海鷗忘機智岡蝶驚飛繞亦知山房靜而被俗客擾
作詩寄殷勤努力須壯少他年騰踏去蕙帳猿驚曉

廣東

通志

黃伯固 補

伯固字子堅將樂人嘉定間知上高縣

淵觀亭

江山無古今闡發自我輩心期得地勝有目皆一快

負郭西綠川衆流翕以漚水光開三面結屋此其最
驚塵劃清漪景象極爽塏泓澄湛寒碧潭影尤可愛
巖前列煙樹翠色聯不解盤坳石下瞰林立錯奇怪
雄觀喜新獲曠境了無礙人謀孰使然天作若有待
學宮爾多士游息於此在豈但濯爾纓亦可蒨爾佩
條然魚在藻行矣鯢化海維茲淵靚名妙處默領會
中庸至矣夫智者樂在內水德本無虛人心亦清灑
卽物以察已致之不在大清源堪疏濶世慮滌昏昧
曾子浴乎沂不出一唯外淡平賈傳心或可分一派

公餘漫興

蓼花秋水漫官衙
令尹情懷自一家
退食小齋無俗

事閒呼童子問桑麻

上高縣志

陳應龍

補

應龍字定夫甯德人
精尚書春秋又喜讀孫
吳書嘗試右庠陳傅良
置之首選授修仁尉

呈徐憲應

弱冠弄筆硯恥爲章句儒
夜半劍氣發精光射天衢
欲分天子愛張燈閱地圖
七閩山水秀我亦思故廬
世事苦齟齬吾道甯躊躇
一官如涕唾焉能輕重吾

甯德志

陳

藻補

藻字元潔福唐人林綱山之高弟有樂軒集
劉后村序云樂軒七十五迺卒年出于其師
而窮猶甚于其師城中無片瓦僑居福清縣
之橫塘開門授徒不足自給至浮游江湖崎
嶇嶺海積鏹得百千歸買田數畝輒爲人奪
去今讀其文講學明理浩乎自得不汲汲于
希世求合螢窗雪案猶宗廟百官也菜羹脫
粟猶堂食萬錢也入則課妻子耕織勤生務
本有拾穗之歌焉出則與諸生弦誦登山臨
水有舞雩之詠焉

題劉氏翠微亭

舊屋紅葉外新亭綠樹旁江晴孤棹見雨近衆山藏

學圃未成趣催詩何太忙他年多橘柚此地一瀟湘

福州城北吳氏新樓之作

千山匝匝繞三山盡屬危樓一
覩閒雲漢星辰隨道遠鄰家花木不容慳
憑闌要取西湖盡落葉尤宜朔吹寒
况是先生莊列輩眼高人境幾層看

何鎬補

鎬字叔京邵武人兒子從朱子遊以父恩補
安溪簿調善化令卒朱子銘其墓學者稱壹
溪先生著述甚富

七臺山

一上青雲梯杖藜披素襟追隨同聲客不作殊方音
過雨飛重泉積煙昏茂林疊嶂杳峭嶒竦峰起嶮嶮
仰闕天門開俯窺地戶深丹壑收暝色絳霞結幕輕
天空抗高館嵐散淩孤岑滄海飛赤鳥疎林散黃金
彷彿天仙來逍遙上帝臨雷電屢興滅日月相深沈
遐討挹元氣冥搜清道心

邵武府志

彭止補

止字應期崇安人自號漫者有刻鵠集

題辛稼軒齋中

棊子聲乾案接塵午窗詩夢煖於春清風不動堦前

竹誰道今朝有故人

建甯府志云彭止嘗謁辛棄疾值其晝寢題一絕于齋而去稼軒覺遣人追之延留累月

彭 俟補

俟崇安人官朝議大夫

拯攬試于京師以詩勉之

送汝趨京邑休辭馬上塵人知官祿貴家為買書貧

萍礪先修業口騰欲奪身此行偕攬轡同醉杏花春

萬姓統譜

陳 淳補

淳字安卿龍溪人受業朱子之門嘉定中以

特奏恩授安溪簿有北溪字義

題江郎廟

三石參天作柱擎自從開闢便崢嶸何爲末俗好奇

怪盡道江郎魄化成

四朝詩

蔡元定

補

元定字季通建陽人從朱子游尤表楊萬里

薦于朝以疾辭韓侂冑僞學之禁爲言者所

詆謫道州卒賜諡文節學者尊之曰西山先

生

自勵詩

數間茅屋環流水布被藜羹飽暖餘不在利中生計
較肯千名上著功夫窗前野馬閑來往天際浮雲自
卷舒窮達始知皆有命不妨隨分老樵漁

武夷山志

蔡淵補

淵字伯靜號節齋元定長子

仲弟來歸歲晚有懷

明月照席寒生我愁百端冉冉歲云徂游人不願還
相送荷花碧相望楓葉丹高樓日千回散步東林隈
攀條復攬秀日暮空徘徊金杯白玉臺猶能對寒梅
寄書豈不早三月千里道敢怨歸軒遲但念堂中老

春風萱草生更樹堂前庭

詩家鼎鑪

蔡 沈補

沈字仲默元定子少游朱子之門從父謫道
州護喪還隱居九峰卒諡文正

遊西山

柴荆相依倚綠篠自蒙密秋蘭澗中花山果路邊實
沿岡引霜藤臨流坐寒石日暮陰崖開雲收遠山出
疎籬尙存菊荒庭舊垂橘絲桐想虛堂簡策見靜室
俯仰今幾時漫然已陳迹摩挲蒼苔痕屐齒不可識

建甯府志

贈琴士翁明遠

膠漆本無意絲桐非有情因緣醉翁指發此無窮聲
蕭蕭秋風引葉落渭水濱喧喧陽春歌花明錦江城
離鸞月徊徊別鶴雲冥冥清冷灑毛髮震蕩驚雷霆
曲度神莫測調高妙難名時方多艱虞掩耳誰爲聽
無爲恩怨兒女語敵場勇士軒昂行

詩家
鼎鑪

武夷山天柱峰

才旣非時用性本愛岑寂決策名山游幽隱遂成癖
春風百花紅秋月千嶂碧煙霞結綢繆猿鳥自疇昔
乘閒撫深壑噴薄鳴鐵笛笑挹天柱峰高寒幾千尺

以上武
夷山志

章才邵補

才邵字希古崇安人以父蔭補官嘗守臨賀
辰陽晚歲與朱子游

過清遠峽

崑頭風急樹欹斜溪畔漁樵十數家老盡往來名利
客年年秋水映蘆花

錦繡萬
花谷

釣臺

短櫂夷猶七里灘人亡依舊水光寒漢家名節君知

否盡在君家一釣竿

釣臺
集

劉子寰補

子寰字圻父號篁嶸建陽人居麻沙早登朱
文公之門有篁嶸集

杜若

欽州五月土如炊滿山杜若芳菲菲素英綠葉紛可
喜勁烈不避炎歊威採之盈掬薦蔬食臧獲失笑庖
人譏君不見屈平夕餐賦秋菊魂兮無南盍來歸又
不見坡公服食得臬耳扣角自嘆從前非伊予假祿
二千石窮比二子猶庶幾食花嚼蘂有真樂一飽何
必謀甘肥尙餘升合漬生蜜從他蕙苾生珠璣全芳
備祖

金鳳花

天霜凋九陵梧桐日枯槁鳳德何其衰驚飛下幽草
九苞空髣髴衆彩各自好黃中獨含章見晚更傾倒
託根幔亭峰弱質深自保便翮金翅短淡泊乃幾道
俗眼迷是非人閒迹如掃

合璧事類別集

楊與立

補

與立字子權浦城人受業朱子之門嘗知遂
昌縣因家蘭谿學者稱船山先生

幽居

柴門闌寂少人過盡日觀書口自哦餘地不妨栽竹

木放教啼鳥往來多

灋洛風雅

林用中補

用中字擇之號東屏古田人遊朱子之門偕
朱子游南嶽有倡酬詩百四十餘首

敬夫用晦翁定王臺韻賦詩同次韻

寂寞番君後光華帝子來千年餘故國萬事只空臺
日月東西見湖山表裏開從知爽鳩樂莫作雍門哀
後洞山口晚賦

西嶺更西路雲嵐最窈深水流千澗夜樹合四時陰
幽絕無僧住閑來有客吟山行三十里鐘磬忽傳心

贈上封諸老

上封臺觀靜夕霽景偏清月下聞禪語風中有磬聲
龍池留古迹雁塔寄餘情借問房前樹東窗忽偃生
以上南嶽
倡酬集

余良弼補

良弼順昌人

教子詩

白髮無憑吾老矣青春不再汝知乎年將弱冠非童
子學不成名豈丈夫幸有明窗並淨几何勞鑿壁與
編蒲功成欲自殊頭角記取韓公訓阿符

萬姓統譜云良弼子大推從朱子游深得求放心之旨兩捧鄉書良弼有教子詩云云

章

康補

康字季思浦城人居吳不仕人稱聘君從學

於朱子

破山寺

名山久相望今日爲著屐到寺第一義古松足蟠屈
一一龍蛇形風雷氣蕭瑟瓔珞檜兩株皆數百年物
佛燈耿青熒像設暗金碧雲廊極徘徊老屋共崢兀
僧房小盤薄西原訪泉石于其最幽絕似可便築室
因而思古人多有愛山癖要之亦何爲一賞事已畢

上方不及登尙或俟他日無非會心處妙同箭鋒直
山靈謂何如移文茲不必作詩留山中併可告來轍

破山

詩志

劉

淮

補

淮字叔通號溪翁建陽人朱文公之高弟

朱子跋云叔通之詩不爲雕刻纂組之工而平易從容不費力處乃有餘味

韓家府

嘉定初作

寶蓮山下韓家府鬱鬱沈沈深幾許主人飛頭去和
虜綠戶雕牆鎖風雨九世卿家一朝覆太師之誅魏
公辱後車不信有前車突兀眼前看此屋

四朝聞見錄云韓侂胄居太廟三茅之旁後
山爲閣古堂爲閣古泉舊名青衣有青衣童
見泉上故名爲流觴曲水泉自青衣下注于
地凡有十二折旁砌以瑪瑙泉流而下瀦于
閣古堂渾涵數畝有桃坡十有二級夜宴則
殿巖用紅燈數百出于桃坡之後以燭之其
雲巖最奇者曰雲岫侂胄居之既久歲累月
川奇挾勝窈窕深疑爲洞天福地之居
韓敗有旨盡給還甯壽復爲禁地建陽劉淮
賦詩云云

平遠臺

海天漠漠水雲寬開到梨花正自寒卻擁重裘上平

遠愁心千疊倚欄干

詩家鼎鑪

劉學箕

補

學箕字習之屏山先生子翬之孫七者翁珙
之子有方是閑居士小稿

劉叔通云居士詩摩香山之壘詞拍稼軒之
肩

不如歸去

禽言

不如歸去愁緣怨紅春欲暮汝勸行人歸行人勸汝
住鳴聲不住良苦辛啼得血流無用處不如歸去吾
今歸千聲萬聲爾何爲

環洲江氏園

欲覽環洲勝維舟步石磯踏青隨野色穿翠任春霏
地迴知山遠村灣覺水圍東風輕薄甚桃李亂荆扉

以上方是閑
居士小稿

馮取洽補

取洽字熙之號雙溪翁延平人

送劉篁嶸

來似孤雲出岫閑去如高月耿難攀若爲化作修修

竹長伴先生篁嶸山

詩人
玉屑

自題交游風月樓

平揖雙峰俯霽虹近窺喬木欲相雄一溪流水一溪
月八面疎櫺八面風取用自然無盡藏高寒如在太
虛空落成恰值三秋半爲我吹開白兔宮

嚴

詩人玉屑云一溪流水一聯詩林皆以爲秀傑之句案截江網以爲吳勢卿作未知孰是

羽補

羽字丹丘一字儀卿邵武人自號滄浪逋客

有滄浪吟

滄浪詩話云論詩如論禪漢魏晉與盛唐之詩則第一義也大厯以還之詩則小乘禪也已落第二義矣晚唐之詩則聲聞辟支果也學漢魏晉與盛唐詩者臨濟下也學大厯以還之詩者曹洞下也大抵禪道惟在妙悟詩道亦在妙悟孟襄陽力學下韓退之遠甚而其詩獨出退之之上者一味妙悟而已惟悟乃爲當行乃爲本色夫詩有別才非關學也詩有別趣非關理也然非多讀書多窮理則不能極其至所謂不涉理路不落言筌者上也詩者吟詠情性也盛唐諸人惟在興趣羚羊挂角無迹可求故其妙處透徹玲瓏不可

奏泊如空中之音相中之色水中之月鏡中之花言有盡而意無窮近代諸公乃作奇特解會遂以文字爲詩以才學爲詩以議論爲詩夫豈不工終非古人之詩也蓋於一唱三歎之音有所歉焉且其作多務使事不問興致用字必有所來厯押韻必有出處讀之反覆終篇不知著到何處其末流甚者叫噪怒張殊乖忠厚之風國初之詩尙沿襲唐人王黃州學白居易樂天楊文公劉中山學李商隱盛文肅學韋蘇州歐陽公學韓退之古詩梅聖俞學唐人平澹處至東坡山谷始自出已意以爲詩唐人之風變矣山谷用工尤爲深刻其後法席盛行海內稱爲江西宗派近世趙紫芝翁靈舒輩獨喜賈島姚合之詩稍稍復就清苦之風江湖詩人多效其體一時自謂之唐宗不知止入聲聞辟支之果豈盛唐諸公大乘正法眼者哉

四庫全書提要云考困學紀聞載唐戴叔倫語謂詩家之景如藍田日暖良玉生煙可望而不可卽司空圖詩品有不著一字儘得風

流語其與李秀才書又有梅止於酸鹽止於鹹而味在酸鹹之外語蓋推闡叔倫之意羽之持論又源於圖特圖列二十四品不名一格羽則專主於妙遠故其所自爲詩獨任性靈掃除美刺清音獨遠切響遂稀五言如一徑入松雪數峰生暮寒七言如空林木落長疑雨別浦風多欲上潮洞庭旅雁春歸盡瓜步寒潮夜落遲皆志在天寶以前而格實不能超大厯之上由其持詩有別才不關於學詩有別趣不關於理之說故止能摹王孟之餘響不能追李杜之巨觀也

黃公紹序云粹溫中有奇氣嘗問學於克堂包公爲詩宗盛唐自風騷而下講究精到石屏戴復古深所推敬自號滄浪逋客江湖詩友目爲三嚴與參仁同時皆家苕溪之上參志則崖岸外無廉稜論議之間微見其際若日不充貢大庭當拜詔衡宇或勸廣交延譽則掩耳不答高卧中林瞪視一世號三林居士仁好古博雅蜀吳曦之叛楊巨源誅曦爲安丙憖而殺之嘗作長憤歌爲時所傳誦

周亮工序云抑先生所著有滄浪吟暨詩話三卷余進樵之人士詢所謂菖溪嚴坊者蔓草離離陵谷莫辨因崇飾麗譙奉先生而俎豆之卽以詩話顏斯樓抑元人黃元鎮秋聲集四卷其五言之妙遠追陶謝近體亦在高岑王孟之間殊無當時陋習余深賞之元鎮亦樵人似嘗探星宿於嚴氏者余向欲於西塢萬木間構秋聲亭鑲黃集置其中使與詩話樓巍然並峙庶幾千載風流後先輝映而滄浪音響益爲不孤亦樵川之勝事也

古懷儂歌

五兩轉須臾相望奈何許寄語黃帽郎船頭慢搖櫓
君子如白日願得垂末光妾心如螢火安得久照郎
郎去無見期妾死那瞑目郎歸認妾墳應有相思木
船在下江口逆風不得上結束作男兒與郎牽百丈

贈呂仲祥

雪中誦招隱高卧閑琴尊忽有呂夫子清晨扣我門
天子忠烈後家聲四海聞神交三十載方此挹清芬
吾道識宗主文章詔討論期我名山遊招我出塵紛
伊余抱病久局促滯中園平生海嶽交零落今誰存
今日對夫子使我開心魂忽覺此身去萬里如空雲
已見赤城霞疑聞天姥猿世道久崩迫誰將元化分
濛濛六合間莽莽塵沙昏所以賢達士甘將麋鹿羣
終欲從夫子超然凌紫氛松間兩白鶴爾實聞斯言

遊臨江慧力寺

舟中望古剎川上移琴尊隱隱林閣見迢迢鐘梵聞
列岫不離席驚濤常在門風帆與沙鳥汎汎隨朝昏
天高一幡挂室靜眾香焚煙起多近郭鴉歸無遠村
松際尙微雪經年來暮猿賞惟靜者契法對高僧論
安得息塵駕永懷瞻獨園明朝別此去惆悵滿松雲

山居卽事

稍欣入林深已覺煩慮屏霜果垂秋山歸禽度風嶺
紛紛葉易積漠漠雲欲盛礪戶寂無人松蘿窅然暝
唯聞山鳥啼月出柴門靜終歲寡持醪延歡聊煮茗
羣書北窗下帙亂誰能整

訪益上人蘭若

獨尋青蓮宇行過白沙灘一徑入松雪數峰生暮寒
山僧喜客至林閣供人看吟罷拂衣去鐘聲雲外殘
寄山中同志

我有三足鹿放之在碧山別來幾千日昨夢忽來還
松色入天盡巖花落地閒憑君一問信沿月上潺湲
喜友人相訪擬韋蘇州

朝朝竹林院閉戶讀殘書几閣晨風入荒郊寒露餘
故人步履至清坐喜脚屨輟卷還留興漱泉同飯蔬
霏雪錄云巖滄源之于詩刻意古作卓然不
爲流俗所染五言如云云

登天皇山作

我來陟高頂俯瞰臨長川
陰厓隱落日疊嶂鳴飛泉
獨立一世外所思千古前
回看鳥沒處茫茫生白煙
客中別吳季高

悠悠遠別半生悲
白日相逢又語離
海內風塵驚不定
天邊消息到何時
洞庭旅雁春歸盡
瓜步寒潮夜落遲
惆悵孤舟從此去
江湖未敢定前期

和上官偉長蕪城晚眺

平蕪古堞暮蕭條
歸思憑高黯未消
京口寒煙鴉外滅
歷陽秋色雁邊遙
清江木落長疑雨
暗浦風多欲

上潮惆悵此時頻極目江南江北路迢迢

寄郭招甫時在潯陽

夢向三江買釣船挂帆西去白雲邊窗開曉色香爐
見門落寒聲瀑布懸百年酒興陶彭澤四海詩名孟
浩然何日真尋塵外迹焚香酌茗話先賢

早春寄潛齋王使君

昏昏醉睡情朝起日日柴門待煖開春至任從花鳥
笑客來須仗酒尊陪移舟動覺依江柳策杖時能訪
早梅忽憶使君聯騎去此時乘興且銜杯

送崔九過丹陽郡上荆門省親

江國歸心一雁牽
河橋分手數杯傳
千厓萬壑秋聲裏
匹馬孤帆落照邊
牛渚寒波翻極浦
荆門晚樹合遙天
他時莫枉瑤華問
南北相思各渺然

聞笛

江上誰家吹笛聲
月明霜白不堪聽
孤舟萬里瀟湘客
一夜歸心滿洞庭

吳中送客歸豫章

川程極目渺空波
送爾歸舟奈別何
南國音書須早寄
江湖春雁已無多

臨川送周月船入京

別時把酒已魂消別後音書恐闕寥一片離心寄春

水隨君船入浙江潮

以上滄浪吟

嚴

仁補

仁字次山號樵溪邵武人有款乃集

塞下曲

漠漠孤城落照閒黃榆白葦滿關山千枝羌笛連雲

起知是胡兒牧馬還

詩林萬選

平遠樓

湘中病客思歸日城上高樓獨倚時半樹夕陽鴉集

早一江秋色雁來遲

詩家鼎鑪

嚴

參補

參字少魯自號三休居士與丹丘次山齊名

世號三嚴

梅

衣染龍涎與麝臍裁雲剪月作冰肌小瓶雪水無多

子只參橫斜一兩枝

後村千家詩

香雪

天遠正難窮樓高不堪倚醉夢入江南楊花數千里

詩家

鼎鑪

嚴

肅補

肅字伯復號鳳山

落花

片片落花飛隨風去不歸如何臨欲別不得傍君衣

詩家

鼎齋

巖

粲補

粲字坦叔一字明卿邵武人羽之族弟也登

進士第授清湘令有華谷集

宋百家詩存小傳云嘗著詩緝與朱晦菴詩傳相表裏學者宗之其詩清迥脫去季宋綸膩之習戴石屏贈句云粲也苦吟身束之以簪組遍參百家體終乃師杜甫其相許如此

昭君怨

欲洗鉛華盡那須畫手工玉顏翻自悞不似舊圖容
春晚

向來得意在煙霞失腳黃塵負歲華過卻海棠渾不
省夢中猶自詠梅花

林和靖祠

白雲人已矣古屋自蒼苔林下誤疑鶴水邊空見梅
市人攜酒至歌女掉船回檢點幽棲處湖光似向來
招提遊

幽尋愜所適蘭若白石靜天籟鳴松聲古意滿苔徑
清泉醒客心啼鳥喚僧定留連不能去翫月歸路永

煩抱忽如遺僧境得清勝花發岳洞幽雲生窗戶冷
來驂樹陰直歸樵川光暝遺思山蒼蒼半空聞夕磬

畫梅蘭竹石

正憶吟窗占竹坡風煙觸眼奈愁何梅蘭只作從前
瘦石上蒼苔別後多

建德縣梅山寺

公退逢長日清遊到寶坊山圍露天小徑遠引溪長
苔壁晴雲溼松軒暑月涼鐘聲半歸路回首暮蒼蒼

子陵灘

西風吹雨暮江寒想見當年獨把竿不是君王思故

舊何人知有子陵灘

重九後五日遊齊山

官癡縛辰酉節物如相負茲遊未覺晚黃花落吾手
沒鷗江自迥落葉山新瘦淒涼千載心西風一搔首

任機宜新圃

小剎煙苔地春生一笑閒亭邀鄰圃樹臺揖隔城山
幽夢壺天曉清時幕府閑旋移花盡活容我醉來攀
發清湘三首

歸櫂將秋色三湘是勝遊灣回仍小嶼灘過盡平流
臨水聞僧磬隈巖隱釣舟江頭每佳處沽酒小夷猶

花樹移方活丁寧莫損殘待逢春氣暖開與後人看
酒任隨車載詩從就柱刊料應吟賞處說著種時難
栽樹未花開其如行色催遙憐今歲雪誰看一庭梅
餘俸刊詩卷歸程買酒杯輕舟下灘穩鷗鷺莫相猜
客裏

客裏還來此寒燈耿獨吟一官江國夢十載草堂心
木落秋聲小蛩孤夜思深驅馳空自許冉冉鬢霜侵
秋懷

秋懷不到夢歷歷數寒更坐得楚天白吟教湘水清
殘燈搖壁影片葉墮堦聲起看孤城霧人間事又生

兵火後還鄉

萬屋煙消餘塔身還家何處訪情親舊時巷陌今誰

問卻問新移來住人

詩人玉屑

句

風池行落葉

梅磻詩話云止一句爲鄭安晚稱賞次日有中舍之除

吳

錡補

錡字信可永福人

遊永福方廣巖

曾訪神仙巖洞來人言偉觀似天台藤蘿足下猿猱

閩詩錄丙集卷十三
三
嘯鐘鼓聲邊日月開燈續佛光凝紫翠雲將蜃氣作
樓臺最憐貫石神龍尾猶帶天東雨露回

游宦紀聞云吳兄信可誠敬而疏通博學而
和粹世南方以得友爲喜納友不百日而遂
隔今古追思紀錄以備遺忘

閩詩錄丙集卷十三終